

## Naqqiut

Taarserpaa akissuteqaat 02-04-2023-meersoq  
(Meeqqanut tapit pillugit Naalakkersuisut suliaqarnerat pillugu naqqiuteqarpoq)

**Meeqqat piitsuussutsimik eqqugaasut, ajornartorsiutip annertussusaanut aamma ajornartorsiummut qanoq iliorluni qaangiiniarluni aaqqiissutissaq pillugu apeqquteqaat aallaavigalugu oqallinnissamik siunnersuut**  
(Inatsisartunut ilaasortaq, Asii Chemnitz Narup, Inuit Ataqatigiit)

### Akissuteqaat

(Isumaginninnermut, Suliffeqarnermut Nunamullu Namminermut Naalakkersuisoq)  
**Siullermeerneqarnera**

Inatsisartunut ilaasortaq Asii Chemnitz Narup (Inuit Ataqatigiit) meeqqavut toqqissisimasumik peroriartornissaat qanoq qulakkeerneqarsinnaanera pillugu oqallinnissamut pingaarutilimmuut siunnersuuteqarmat qujavunga.

Meeqqat akornanni piitsuussuseq ajornartorsiutaavoq, inuiaqatigiittut uagut akuersaarsinnaanngisarput. Nalunngilarput, meeqqat piitsuussutsimik eqqugaasut ujariatsisartut, aamma alliarturnerat amerlasuutigut immikkoortitaanermik, ajornerusumik atuartuunermik kiisalu peqqissuseq eqqarsaatigalugu timikkut tarnikkullu ajornerusumik inissisimanermik aqquasaqarfiusartut. Siunissaq ungasinnerususoq eqqarsaatigalugu meeqqat piitsuussusermik eqqugaasut inersimasunngornermi sumorsuaq sunniuteqartartoq pissusilersornermut, peqqissusermut aamma suliffeqarnermut attaveqarneq ajornerusumut kinguneqarluni. Taamaattumik meeqqat piitsuussutsimik eqqugaallutik alliarturnut amerlassusaat qanoq ililluta ikilisissaneripput pillugu oqaloqatigiissutiginnissaa pisariaqarpoq.

Meeqqat piitsuussutsimik eqqugaasut pillugit periaatsit arlallit atorlugit naatsorsorneqarsinnaapput. Meeqqat piitsuussutsimik eqqugaasut annertussusaannut apeqqutaasarpoq piitsuussuseq qanoq nassuiarneripput. Meeqqat piitsuussutsimik eqqugaasut tassaasarput ilaatigut pilersuinermi isumalluutinik amigaateqarneq imaluunniit annikippallaanik isumalluuteqarneq. Siunnersuummi meeqqanut tapiissutit meeqqat piitsuussutsimik eqqugaasut akornanni uuttuutitut atornerarpoq. Meeqqap pitsaasumik pilersorneqarnissaanut tunngavissiinnermut inatsisit aqputigalugit qulakkeerinninnissamut meeqqanut tapiissutit iluaqutaapput.

Meeqqap ilaqtariillu inuiaqatigiinni peqataanissamut periarfissaannut aningaasaqarneq annertuumik pingaaruteqarpoq. Taamaattumik Naalakkersuisut meeqqanut tapiissutit pillugit aaqqiissuteqarneq iluarsartuunniarlugu aallartitsipput.

Kalaallit Nunaanni meeqqat 28 %-ii ilaqtariinni isertitakitsuni, meeqqanut tapiissutinik pisartagaqartuni, alliarturnerat ima isumaqanngilaq, meeqqat atugarliorlutik inuusut. Ilaqtariit ilaat aningaasaqarnikkut isumalluutaat ikitsuinnaasinnaapput, kisianni meeqqaminnik isumaginnillutik toqqissisimasumik alliarturnittisut. Ilaqtariit allat aningaasaateqarlartuusinnaapput, kisianni meeqqaminnik toqqissisimasumik

isumaginninnermillu pisariaqartitaat naammassisinnaanagit. Taamaattumik meeqqat piitsuussutsimik eqqugaasut pillugit angissusileruminaapput, aamma meeqqatta akornanni piitsuussuseq qanoq annertutigisumik atugaatiginersoq pitsaasumik ilisimasanik pilersitsissalluta kissaateqarutta sukumiisumik isiginninnissaq pisariaqarpoq.

Saqqummiussinermi 'Meeqqat Pisinnaatitaaffii pillugit Naalagaaffiit Peqatigiit Isumaqatigiissutaata malinneqarnissaanut iliuusissatut pilersaarut 2023-2030' Naalakkersuisut nutaamik suliniummik saqqummiussiniarput, piitsuussutsimut killigititaq erseqqissarniarlugu. Tamanna Kalaallit Nunaanni piitsuussuseq pillugu pitsaanerusumik ilisimasanik pilersitsinissamut qulakkeerinnissaaq, tassunga ilanngullugit meeqqat piitsuussutsimik eqqugaasut. Iliuusissatut pilersaarummi pisortanit ikiorsiissutinik aqqissuusseqqinnermut aamma innersuussutigineqarpoq. Aqqissuusseqqinneq ikiuutaassaaq angajoqqaat amerlanerusut suliffeqalernissaannut. Taamaalillutik pitsaanerusumik pilersuinissamut tunngavissinissamut pilersitsisinnaassapput aamma meeqqamut maligassiullutik. Aqqissuusseqqinneq aamma pisortanit ikiorsiissutinik pisartagaqartumut nammineq inuunermi atukkani pitsanngorsarniarlugit kajumissuseqalersitsissaaq periarfissiillunilu, taamaalilluni inuiaqatigiinni piitsuussuseq annikillisillugu.

Immikkoortortaqarfiit akimorlugit suleqatigiikkutta aatsaat meeqqat piitsuussutsimik eqqugaasut qaangerneqarsinnaapput. Taamaattumik Kalaallit Nunaanni meeqqat piitsuussutsimik eqqugaasunik akiuiniarluni sulinermi suliffeqarnermut suliassaqarfik, inersimasunut atugarliortunut suliassaqarfik, aningaasaqarnermut suliassaqarfik, peqqinnissaqarfik aamma meeqqanut, inuusuttunut ilaqutariinnullu suliassaqarfik ilaatinneqarnissaat Naalakkersuisut immikkut ukkatariniarpaat.

Taamatut oqaaseqarluta sammisaq pingaartoq pillugu pitsaasumik oqallinnissaq Naalakkersuisuniit qilanaarivarput.